

ANN HINI GOZ

27 c)

Ann hini goz eo va dous,
Ann hini goz eo zur !

Ha koulskoude, war a welann,
Ann hini iaouank ar vravran.
Ann hini goz, etc.

Ann hini iaouank a zo koant,
Ann hini goz e deuz arc'hant.
Ann hini goz, etc.

Me ne d'ann morse d'ar marc'had,
Na ro d'in-me gwerz boutaillad.
Ann hini goz, etc.

Ann hini goz am c'hondu mad ;
Ann hini goz a zo d'am grad.
Ann hini goz, etc.

Ha koulskoude ebarz e ker,
Ann hini iaouank a garer.
Ann hini goz, etc.

Ann hini iaouank zo ker sounn !
Ann hini goz zo 'unn tammik kroumm.
Ann hini goz, etc.

Ann hini iaouank zo lijer,
Ann hini goz a zo pounner,
Ann hini goz, etc.

Ann hini goz e deuz bleo gwenn,
Ann hini iaouank bleo melen.
Ann hini goz, etc.

Ann hini goz, liou raden zec'h,
Ann hini iaouank liou an erc'h ;
Ann hini goz, etc.

Liou ann erc'h eo hag hi ker ien,
Na ra gozik eur zell ouz-en.
Ann hini goz, etc.

Ha koulskoude n'ouzounn perak
Ma c'halon ra tik-tak, tik-tak.
Ann hini goz, etc.

Tik-tak a ra ma c'halon baour,
Pa'z ann da skei war doull ann our.
Ann hini goz, etc.

Tec'h alese, tec'h kuit, tec'h pell !
Ann hini goz a zo kant gwell !
Ann hini goz, etc.

Ann hini goz a zo kant gwell ;
Ne ra ket taillou demezell.
Ann hini goz, etc.

Diaked ann demezelled,
Diaked e tri rann ar bed.
Ann hini goz, etc.

Demezelled na reont bepred
Nemed goab euz ar vretoned.
Ann hini goz, etc.

Pa daolann dourn war benn he glin,
Ann hini goz a c'hoarz ouz-in.
Ann hini goz, etc.

Ann hini goz zo bretonez,
Ann hini iaouank zo gallez.
Ann hini goz, etc.

Fae eo gan-en gant ar Gall brein,
Gant kroc'hen ann diaoul war he gein.
Ann hini goz, etc.

Fae eo gan-en gant ar C'hallez,
Gant-hi karnou enn he botez.
Ann hini goz, etc.

Goude tri deiz e skuiz pep den
Gant glao, avel ha merc'h estren.
Ann hini goz, etc.

Mar komzi a briedelez,
Komzit d'in euz ar vretonez.
Ann hini goz, etc.

Ne lakfenn van pa ve laret
Eo ar vretonez groac'hellet.
Ann hini goz, etc.

Evit-han da vout groac'hellet,
Eunn aval, blaz fall n'en deus ket.
Ann hini goz, etc.

Bezef drouk gant neb a garo,
Troc'het ann ed, dorned e vo.
Ann hini goz, etc.

Bezef drouk gant neb a garo,
Ma dous ha me ni eureujo.
Ann hini goz, etc.

Ni gousko enn eur gwele kloz
War ar pell fresk bemnoz, bemnoz.
Ann hini goz, etc.

Ha pa ve ker koz hag ar bed,
Gan-en e vezo gwalennet.
Ann hini goz eo va dous,
Ann hini goz eo zur !